



永嘉縣志卷之三十七

雜志二

遺聞

謝康樂守郡愛永嘉有東山之勝且山水尤美於會稽乃
創第鑿池於積穀山之下迎母太夫人來養欲定居焉未
幾陞臨川內史遂攜其子鳳及長孫超宗以行而留其次
孫超祖侍祖母太夫人於永嘉之第至臨川為有司所劾
謫廣州尋死於誣太夫人憂患而卒葬於所居第之城東

飛霞洞之左不復有東歸之志於是遂為永嘉人

謝夢符
鶴陽謝

氏宗支記夢符號開樵宋咸淳中任郡庠經諭記作於元
大德三年自超祖以下二十世名說第五五公者遷居相

永嘉縣志卷之三十七 雜志二 遺聞

命唐琢往勘回奏乞減額二分于是薛尚書良朋鄭少卿

伯熊吳檢正龜年共言於廟堂乞減額戶部持之不下會

良朋請對乞依唐琢所奏三年有旨從之陳謙永益編見歐乘補

康執權字平仲按歐乘補誤作字伯可河南祥符人龍圖閣直學士

建炎閒扈蹕至永嘉因家焉乾道丁亥八月己卯卒贈銀

青光祿大夫時年九十有一葬于孝義鄉正興院後山之

左頤人郝氏附焉宋戶部侍郎向伯奮康公墓誌

葉水心作汪參政墓誌有曰左右執政共持國論參政蓋

與秦檜同時者汪之孫為浙東憲綱不平之請改水心不

許答曰檜時執政某未有言其善者以先公厚德故勉為

之自謂已極稱揚猶以為未足邪水心死後刊文集者為

刪去左右執政四字非水心意也舊志

趙忠定令水心草詔序所以立嘉王之故云病無管藥之

人崩乏居喪之主忠定不敢用易之水心云禍將作矣立

君大事不明言其故必有小人造謗興讒以禍諸君者竟

不言功隨即去國未幾韓侂胄果誣忠定貶死水心不受

賞亦不受禍可謂知幾君子同上

周端朝張衡徐範蔣傅林仲麟楊宏中皆出譴惟周受禍

略備初自廷尉聽讀衢州已次半道有旨再赴廷尉周始

自分必死時憲聖在上韓猶不敢殺士故欲以計殺之周

竟不死復聽讀永州杜門敎授生徒後以韓誅放還復籍於學爲南宮第一人

四朝聞見錄

林温生延祐丁巳八月八日以春秋登至正辛巳江浙鄉闈試第一是科董彛第四董朝宗第五朱公選第二十八實殿榜後榜中孔暘王孔文高祿卿潘如珪皆再薦後温以恩例任奉化州學正董彛亦爲學正慶元彛慨然曰吾父嘗出應書大父得奇夢記諸籍云丁巳年九月七日夜夢林温作魁朱姓人鎖榜第四第五連姓董內四名用硃筆點云是舊請舉者稽之於今無有不合其最異者温之生甫一月耳

舊志下同

洪武三年五月二十一日中書吏部奉旨選天下敎官入覲奉天門適太史奏文星見親擢十八人俱爲監察御史次日詣武樓下賜袍帶二十五日之任臺官傳令賜宴永嘉許宏士樂清李時可瑞安馬漢平陽孔希普俱與選按明實錄與選者十九人

宣德乙卯春郡守何文淵進諸生講經於明倫堂有羣蜂擁一巨蜂飛集楹間聲如雷郡守顧謂諸生曰羣蜂中有巨蜂爲之主猶士林中有鉅儒爲之領袖此來科狀元之兆耳明年周旋果狀元及第

正統丙辰狀元周旋楊文貞所取一甲三卷未決狀頭問

同事有識周旋儀表者否其人面白豐美對遂以旋卷首晉及臚唱陛見貌寢甚衆論悵然蓋所問者周旋所答者清安周道也數之前定如此

王瓚初讀禮於開元寺僧舍有芙蓉五月盛開遂於去治丙辰聯科及第瓚少貧販鹽爲業值寒夜泊舟仙洋應氏之船枋主人有異夢款留之妻以女後以榜眼歷官司成少宗伯謚文定應之物色亦奇矣

王子孝諍隨其父鍊之任竹山教諭其邑藍氏女夢有都御史來游園主人奇其夢語旦伺之乃子孝也卽以是女妻之後果至僉都御史

羅峯翁雖入相得君其家人常穿兩截衣服家有子姪放債踏算佔田害人嘗親撻而面詈之或令縣官枷號以警怙勢作威者此皆保全族人之道也

項喬甌東私錄

滴水巷在華蓋山西北舊志云晉太守王羲之嘗臨墨池試筆據元豐二年十二月真華觀戶帖則本觀五嶽殿王右軍祠堂卽墨池故地今亡其處滴水亦不知何水也唐張又新詩序云滴水巷在華蓋山西北流入郡城涓涓不盈不竭謝公與從弟書地無佳井頽華蓋山北湧出一泉名爲滴水卽此水也滴水冷澈碧沙旱時無減水無加澄清好是爲官侶引入孤城一帶斜

岐海瓌譚

我婁侯賓絳帳宛如舊青衿俱已新惟應垂白者猶是守

元人

王弁
州集

順天蕭鳴鳳精於星學官郡守以不職罷歸舟次遇比部張公瓊張素聞蕭術神試以祿命叩之布算良久不言因問之曰祿命書從此可焚矣問何故蕭曰僕閱人多矣無不中者獨於僕與君而失之張曰何也曰僕自揣祿位應至方伯而今止於二千石觀君之命不出三年便當入相而君猶然耶署也豈吾術有未至邪遂別去文忠入京僅三載以議大禮中上意遂大拜既貴憶蕭公言卽起之十餘年果至方伯而卒

舊志

永嘉名書有唐僧書金字法華經藏於郡城壽靈禪寺荆溪結空院唐季有僧惠昇結廬北巖道滿居山南滿能詩昇工柳書嘗寫法華經至普賢勸法品天雨舍利二顆建牙鄉玉清觀御史中丞譔記節度使程詢書丹宋吳說書證道歌於淨光禪寺米元章書周侃龍泉院記鐫諸石後爲黃文簡昇去不知所終王綽撰先賢祠記瓜廬薛師石以篆書刻石於郡庠又有明倫堂養源堂二扁延祐開翰林院待制趙公舉筆書法清麗黃公潛譔容成道院碑記不知何人書丹字亦俊雅已上諸蹟今已亡矣江心寺有宋高宗御書清輝二字扁尙存浴光字被元季方國珍竊

去西山虎跑寺有陳氏世德碑趙文敏筆也湖石穹窿載

以龜趺居民不奈官府搨印鑿壞下端數十餘字且屹立

荒區雨暘淋炙日漸損泐借哉

岐海 礫譚

陶宏景永嘉邑居圖考之地志玉環之木流

按應作橋 亦作溜

賢宰鄉之永寧山永寧鄉之綠嶂山清通鄉之烏石白泉

山均為宏景流連之所見有遺蹟存焉第不知所圖者果

何屬耳蘇長公云能使江山似永嘉永嘉山川秀甲海內

著名非一日矣

宣和畫譜宋御府藏有張旭永嘉帖

俱同上

周感富文學有氣節仕止縣令其子思友亦讀書善談論

攜有松雪大洞玉經標首趙松雪墨蹟五字即感筆也長

可二丈裱者裂斷之司寇王陽德跋趙書此經謂右軍北

海出入結構中則當是松雪真蹟

書畫 跋跋

文信號雪山永嘉人此卷是其自書所作五言律七言絕

句凡八詩不著歲時梁中丞以雪山題趙彥徵畫卷在洪

武六年六月證之謂此卷是洪武初年所作則為元人無

疑以題扇詩中有江南京國鍾峰駐馬之語前詩所稱聽

宣諭者也

翁方綱復 初齋文集

永嘉林叔睿所藏端石馬蹠樣深紫色厚寸許面徑七八

寸有鄭魁銘詩云仙翁種玉芝耕得紫玻璃磨出海鯨血

鑿成天馬蹏潤應通月窟洗合就雲溪常恐魑魅奪山行

亦自攜何蓬春
渚紀聞

瓜廬翁每與四靈聚吟獨主古淡融狹為廣夷鏤為素神

悟意別自然清空荆山劉植跋云瓜廬耕釣于會昌湖上

多肥遯之詞抒性情之正得象外之趣酌準繩之嚴宋詩
紀事

明代三元惟商文毅一人温則有武三元永嘉王名世萬

厯丁酉順天鄉試戊戌會試廷試皆第一舊志

貞義書院聖旨在五都姚溪張孚敬未第時讀書於此及

入相嘉靖七年具奏奉聖旨卿所奏足見篤學以勉就後

來之意書院名與做貞義堂名更做抱忠仍著彼處有司

就書院中蓋敬一亭一座以置朕之五箴抱忠堂門等處

或有損壞亦與修葺舊志

吾甌刻漏舊在子城南譙門上即今之衛治前譙樓也衛治

今為城
守營署永嘉譜云本之燕肅制度極精後梁尙書汝嘉再

作用古水稱法尋以用不效復舊制淳熙中火陸郎中之

淵始命藝士陳宗武改制宗武參呂才燕肅二家法定為

銅壺三日夜天池日天池平水壺萬水壺下水海一視呂

才增退水壺改燕肅四十八箭為二十四冬至夏至各用

一箭春分秋分共一箭餘二十一箭品分氣候用之其餘

大略依舊法淳熙戊申樓宗丞鑰別立刻漏於小廳頗采

宗武法而壺差小以日夜增水各三人不勝煩始創意於
三壺之後別立大架旁設梯級上置圓斛比夜天池之大
六之日一增水令極滿亦置銀管注水易夜天池平蓋爲
木盤比銅荷柄指北以受水又於其後增一銀管亦以漆
竹行之入於退水壺視舊法爲便余觀今譙樓所有刻漏
爲天順五年辛巳周守琰重鑄其款識稱舊者敝於火闕
之有年相傳謂舊者遷於省城朝天門不知何據復綴一
銘曰挈壺有職司彼天時壺旣敝矣職何攸司振頽舉廢
厥職在誰我吏茲土寧不圖斯稽古而制曰模曰規于以
合天毫髮無差君子莅政弗亟弗遲民樂厥生興息有期

作銘紀勝載頌雍熙

岐海
瑛譚

譙樓鼓更點舊管鼓八角十一更以鼓點以鈺鈺閒款識
云梁貞明六年歲次庚辰使司給到角舊以漆竹乾道九
年始倣軍前式改造昏時吹角五人爲三疊搥鼓六人鼓
三百三十三槌爲一通角十二聲爲一疊角聲止乃各搥
鼓千爲三通凡三角三鼓而畢更三點至五點凡再發申
刻惟吹角三疊爲小引後吹角者久矣而搥鼓無聞夫徭
額雖存而專役不設更點測盤香爲候或密或疏初無定
則其視刻漏爲長物更點爲末務古稱有善政者更點分
明司民牧者尙念之哉

同上

許涉齋及之儒志編序云築室城東隅豐湖王氏譜云今之元妙坊上善橋南樹坊名曰儒志宋郡守楊蟠所建蓋王氏先世自閩來甌居瑞安西峴山下至儒志先生之父遷郡城明倫里六世孫益大字居安歷官右文殿修撰自號芹邊居士以所居在郡庠之東也益大子名與字與之築室華蓋積穀兩山間創業謝池里蓋明倫元妙謝池居第相望也攷儒志坊萬厯康熙兩府志俱不載附見王景山傳中乾隆府縣志始附見坊表之末而云未詳其處蓋未深攷請得而互證之蘇平仲開元寺興造記云開元寺在元妙坊東

舊志無元妙坊名今補入

康熙府志下馬臺在元妙坊東

高宗謁天慶宮神御時於此下馬天慶宮卽開元寺萬厯府志尙膳橋在開元寺巷中知元妙坊尙膳橋之所在卽知儒志坊之所在尙膳橋又名上善亦名讓善蓋音相近而異其文耳又儒志先生裔孫光世爲其父處士幽堂志云世居郡庠之東郡表其坊爲儒志以彰其里焉明劉觀槐陰書屋詩序亦云所居在郡庠之東其坊以儒志名子孫處斯里者先後第宅相望則儒志坊塙在今之府學巷與王氏譜所稱上善橋南許氏城東隅之說合夫明之東山書院在華蓋山乃先生講學之所今之東山書院在積穀山麓實先生發祥之地尤足深高山仰止之思數典而

忘其可乎況儒志一坊為永嘉學派淵源所自而前後修志者畧而不書書而不詳其地卒無人焉起而表章之良足慨已今既補錄戴栩三十六坊記於坊表中而詳攷之如右

儒志坊攷

耿逆之亂知縣馬公殉難姪穎姿被害子逸姿尙幼家人抱出託生員李謙受謙受轉託生員潘殿颺抱回撫養二人皆馬公門生忠臣有後固由天佑而冒險存孤則二君亦迥乎難及也

周聲炯貝子事實冊

一說潘廣宇廷颺與馬公有舊又見陳遇春雙忠祠記謂歐人襁而出渡

免逸姿即後為江蘇督糧參議者也

瑣記

王梅溪讀書江心寺寺中住持真歇了禪師知其為龍種時寺前埂子山門屢築不就將成即有龍攪波濤潰之一日梅溪大醉禪師進曰公能捨山門前一塊土乎公必中狀元無疑矣就之乞書券梅溪醉中戲書與之其後禪師坐山門乘涼有一老人拄杖而來攜一童子索地出券示之泫然泣去至今寺中寶藏其券焉

王應奎柳南續談按謝詩亂流趨正絕

孤嶼媚中川蓋孤嶼在兩峯之間自受券後築成平地以沒其蹟今圓通殿大士蓮座下是其遺址也

甄龍友字雲卿少有俊聲詞華奇麗而資性浮躁於鄉人

無不狎侮木待問蘊之為尤甚木生朝為詞賀之末云聞道海壇沙漲也明年蓋諺云海壇沙漲温州出相明年者俗言且待也又嘗損益前人酒令曰鬼魅魍魎魁木以癸未魁天下也一日登對上問卿安得與龍為友甄罔然不知所對既退乃得之曰何不云堯舜在上臣安得不與夔龍為友聞者惜之

齊東野語 案龐元英談藪云雲卿游天竺寺集詩句贊大士大書於壁云可笑倩兮美目盼兮彼美人兮西方之人兮孝廟臨幸一見賞之詔侍臣物色其人或以甄姓名聞曰是温州狂生用之且敗風俗上曰惟此人朕自舉之以為某邑宰後召對不稱旨猶得添倅官至國子監簿

劉錫祖父掩據羲之墨池且百年後為世僕所發太守留公茂潛斷其廬得池於臥內劉氏遂衰其臨政操斷皆類

是葉紹翁四朝聞見錄

永嘉有百筮瀨鄉人斷水捕魚宰生禱祭祈多獲逾時了無所得眾侶忿怨棄業將罷其夕夢見一老人云諸君且可小停忽聞有跳躍聲驚起視之乃巨魚也剉以為鱠頓獲百筮因名瀨焉

劉敬叔異苑

蔡襄造洛陽橋夢大士以須温州三人一目至方可成於是遣人至温訪之一日使者見有三人其二俱瞽其一又僅一目坐河頭分柑而食使者度必此三人乃前致詞已而三人者論使者先回輒同下一井而沒及使者回泉州三人者已先至矣故至今名其地曰分柑河頭蔡君謨洛

陽橋碑記載其事甌乘補 按分柑河在華蓋里沙巷口其井相傳即今興文坊鐵欄井

東坡云余在惠州有永嘉羅漢院僧惠戒來謂曰明日當

還浙東問所欲幹者予無以答之獨念吳越多名僧與子

善者常十九偶錄此數人以授惠戒使歸見之致予意且

為道子居此起居飲食狀以解其念也信筆盡紙語無倫

次又當尚有漏落者方醉不能詳也紹聖二年三月二十

三日東坡居士書

志林 按永嘉城內有羅漢寺宋祥符間賜名崇信教院

林靈素盛時一日有詔兩學之士問道靈素既陞座首詔

太學博士王俊乂久而不出既出乃昌言昔我先聖與老

聃同德比義相與師友豈有摠衣禮黃冠者哉聞者駭然

周煇清波雜志

林靈素作神霄錄自公卿以下羣造其廬拜受獨李綱傳

崧卿曾幾移疾不行

因學紀聞

薛叔仔字德先紹定中任平南尉庚子辛丑温郡薦饑發

廩煮賑至一萬八千餘石奏聞擢官江南東路兵馬副都

監嗣知化州會縮戍丐祠寶祐甲寅進呈中興四朝志傳

經武要畧今上日麻會要玉牒等書

陳懋卿欽薛叔仔墓誌

林邦福字大彥温父也初署常山尉歸浙省左丞擢為鄉

郡知事時山寇竊發掠慈湖將窺城上下洵洵乃白府單

躬走賊巢諭以禍福皆俯首退去為良如初有司上其功

尋以疾卒葬永之建牙鄉

宋景濂文集

陸務觀野廟記云甌越閒好事鬼山椒水濱多淫祀其廟貌有雄而毅黝而碩者則曰將軍有溫而厚皙而少者則曰某郎有媪而尊嚴者則曰姥有容而艷者則曰姑其居處則敞之以庭堂峻之以陞級上有老木攢植森拱蘿葛翳其上鷓鴣室其閒車馬徒隸叢雜怪狀農作之毗怖之大者椎牛炙者擊豕小不下犬雖魚菽之薦牲酒之奠缺于家可也缺于神不可也一朝懈怠禍亦隨之蓋孺畜牧慄慄然病疾死喪眈不日適丁其時而自惑其生悉歸之于神雖然以古言之則戾以今言之則庶乎神之不足過也

岐海
礪譚

谷良號確菴宣德正統歲荒捨粟賑濟又捨米千石倡創大雲寺築唐嶺竹浦嶺路三十餘里遵例出金百兩助軍

御史陳公瓊為題名董儲館石

阮存谷處
士墓誌

谷譜號循菴正

德間歲歉捐穀六百斛賑之又輸粟助之邊儲郡守楊公

且具達授義官谷俊字士毅捐穀六百石授七品

谷氏譜

張昌明明景泰甲戌應詔輸粟京庾授七品散官張斲成化丙戌應詔輸粟五百斛於預備倉又進粟京庾充邊儲

授七品散官張謹成化癸卯陝西荒歉應詔輸粟七百斛

授散官張積宏治壬子募民入粟修荒政因獻七百石備

葉紹祉字次尹號廉齋習申韓業乾隆間同郡張遐齡出守雲南大理葉從游佐幕心存利物與張講求政治主賓相得民懷其惠芒市民洎六崗頭人公送揚旗頌謝其旗正面書青天師太老爺葉清廉勤慎嚴謹夷方收糧平斛用夫有法愛民如子萬民感激百世留名合地頂祝芒市安撫司治下子民暨六崗頭人眾等銜結頂祝不朽上謝共六十三字背面書夷字如蟲篆不可識至今其家猶寶

藏之周藉農衣德述見甌乘補

姚梁號佃芝處州慶元人僑寓永嘉以進士通籍累官至山左按察使子魯培號洙楷聰穎異常年十四隨父至粵

西經岳陽樓詩曰岳陽樓上淡斜暉岳陽樓邊秋雁飛乾坤吳楚此終古廊廟江湖誰與歸斷岸樹依懸酒旆遠波帆颭掠漁磯蒼茫何處聞湘瑟一點君山綰翠微惜甫游泮水年未弱冠而亡戚學標鶴泉文鈔有傳甌乘補

陳瀾號秋槎永嘉場人嘉慶丁卯舉人後改名乙金以教習期滿銓授湖北建始縣道光壬辰赴任舟泊餘干縣麥皮坂夜半失足溺焉子楠情急援之亦溺明晨子抱父屍

出人咸驚異以為孝感所致案楠係孝子本可詳請旌表後據餘干縣來文則以子

楠墜水其父以救子故並罹水厄情節迥異此事必由地方官詣驗詳報豈亦傳聞失實耶姑兩存之

劉上書習醫相傳嘗遊飛霞洞遇吹簫道人授以秘訣自

是醫業日進專以婦科行子孫蕃衍今多世其業甌乘補
萬家傑字興士黔中人能詩工書畫孱弱多病落落寡合
隨父宦金陵父歿遊橐匱當道攜至甌城道光癸未歲卒
年二十有四初疾作自撰壙志云生而茫茫死也何傷彭
殤齊誕大塊文章題曰水雲子墓旁書冢下人自題鐫石
訖攜僕遊東山步至東北隅海壇側命僕云我死必葬此
及卒僕以告當道因遂其志營冢而樹其石以誌不忘予
於癸未秋覽生詩畫甲申春經其冢感生之數奇而情曠
也詩以弔之蘇榮陶富等棲塵落魄天涯幻此身萬古長
眠孤傲客一杯誰奠九泉人小兒造化從天厄大塊文章

特地新欲認本來真面目浮雲傳像水傳神

曾立動隨
意消遺集

市井七才子其詩有膾炙人口者季碧山秋夜云雲峯猶
剩夏露氣已生秋薄暑消今夕新涼動故愁予懷成渺渺
離思寄悠悠俯仰無終極星河徹夜浮默坐思無端高歌
興浩然秋風起衰草涼露咽寒蟬清響趨羣動殘釭照獨
眠平生負豪氣奄忽又經年皆楚楚可人黃巢松之三徑
菊通雲外屋一溪梅放雪中山亦佳祝聖源鼓兒天詞云
驚驚醒鄰兒哭鄰兒哭古月生霜照寒屋亦覺新穎張丙
光子名森字柔木亦能詩工雅過於乃父著有山樓吟稿

永嘉縣志卷之三十八
泰順董霞樵爲之訂定郡博陸曉峯先生嘗稱其春草詩最

綿麗可喜陳遇春筆記

永嘉縣志卷之三十八

襍志三

辨誤

方志之書類皆攬摭舊文更相沿襲不暇致詳然或以
增益而滋訛或以攷訂而轉謬自矜賅洽未能究厥指
歸其弊亦與疏略者等則裨補闕漏糾正瑕疵胥有待
於後人敢蹈襲謬沿訛之咎耶今竊取顏氏匡謬正俗
之義聊就見聞所及獻厥箴規以效愚者之一得若云
發墨守鍼膏肓則吾豈敢至有傳聞異辭不能衷於一
是者則別出之爲存疑云

永嘉縣志 卷三十八 疆域誤

舊志形勝引王十朋綠畫軒記峯巒奇偉林麓靜深環合映帶

案綠畫軒在樂清去玉簫峯二十里所記與永嘉無涉且此係名勝非形勝也今削

山川誤

羅浮山舊志在江北岸華嚴山下又載合山

案合山卽羅浮山不應兩載辨見輿地山川

石門山舊志在府城北十五里賢宰鄉附謝靈運詩二首案靈運所遊是青田石門今磨崖詩刻猶存見栝蒼金

石志舊志湯志俱附謝詩誤矣辨又見輿地山川

芙蓉山湯志在四十四都清通鄉引隋書地理志永嘉有芙蓉山

案隋時永嘉一縣兼有温州五縣之地志所稱芙蓉山似卽雁蕩山雁蕩有芙蓉峯下有芙蓉村故名然境內亦自有芙蓉山一統志云有三峯聳立紅赤相映如芙蓉與樂清境界是矣宋陳虞之禦元兵於芙蓉巖卽此在仙居鄉四十八都今云四十四都清通鄉亦誤

甌江舊志東受樂清之象浦

案象浦在三十六都俗名烏牛浦舊有村莊亦名象浦

與樂清館頭相隔里許三十六都各村溪流俱從此浦南出入港乃指為樂清地誤矣

華巖山舊志有黃巖洞

案黃巖即華巖之誤蓋土音華黃二字不分而載筆者遂從俗書之右軍帖云華巖石硯今有作黃巖石硯者其誤憭然亦有作黃巖山者則尤誤矣

石室山舊志引嘉靖志在城東七十里又引寰宇記石室山南溪入一百二十里有石室可坐千人

案石室山在永嘉場寰宇記所稱宜移入大若巖下在城西北一百二十里亦名石室山不得混而為一舊志誤湯志亦誤

風俗誤

隋書地理志少爭訟好歌舞婦人勤於紡織有夜浣紗而旦成布者俗謂之鷄鳴布

案此條本與永嘉無涉隋書云豫章之俗少爭訟好歌舞勤於紡績非指永嘉也舊志據甌江逸志云云並未檢隋書原文此剽竊稗販之陋習也又祝穆方輿勝覽有此文好作尙舞字下有婦人二字隋志無則竟引祝書可耳今更正

明胡用賓禁約二條

案胡用賓樂清知縣永嘉職官無其人舊志誤

物產誤

倒生松

案松以倒生得名乃形之奇古者耳非別有一種也入之物產殊誤

夾竹桃舊志入木屬又見花屬

案夾竹桃宜入花屬一物兩收誤

金沙舊志引府志郡圃中有金沙花附錄王十朋種金沙花戲呈景盧詩

案梅溪詩乃守饒州時所作蓋饒之郡圃與永嘉無涉
狃獾舊志引薛季宣思石門遊詩注出石門山中狃獾類猿而綠獾類狗而黃蓋猴屬之大者

案浪語集詩有軒轅邱一夢懷徃意悠哉之句注云石門之上有軒轅之邱軒轅邱在青田石門舊志誤樂清志引之亦誤也

鬪魚舊志引游宦紀聞三山溪中產小魚斑文赤黑相間里中兒豢之角勝負聞永嘉亦有之
案永嘉並無此魚傳聞不足據也

祠祀誤

舊志卓忠貞祠在江心寺祀明戶部侍郎卓敬附鮑嘉蘊悼忠貞詩

湯志卓忠毅公祠在郡城南隅萬厓閒移建江中孤嶼附劉

康社重修卓忠貞廟碑文又康社悼忠貞詩張德明悼忠貞詩

永嘉縣志 卷三十一
案劉記乃瑞安卓忠貞祠非江心卓祠也鮑劉張三詩亦當入瑞安舊志湯志誤

古蹟誤

筆亭浙江通志引縣志云縣治西北郭公山有晉郡守王羲之筆亭久圯今字蹟猶存

案舊志富覽亭額係晉王羲之筆亭久圯字蹟猶存通

志改易數字而以筆字屬下句讀遂標筆亭之名誤矣

此條係通志之誤舊志本不誤然恐後之修志者援引通志之文別出一筆亭爲古蹟則誤矣故附辨於此

浮沚書院舊志引萬厓府志宋儒周恭叔故居

案恭叔所居乃浮沚也有自撰浮沚記可證後人卽其

地創建書院而以浮沚名則浮沚當入古蹟不得竟以書院爲恭叔故居也

池上樓舊志引太平寰宇記謝公池在州西北積穀山之東

案謝公池在州東南不得云西北又在積穀山之西不得云山之東此皆舛誤之甚者今不錄

問水亭在學署後煉丹井上

案永嘉學宮圖作活水亭蓋取朱子爲有源頭活水來之義圖列卷首可證舊作問水亭誤

大雲寺淨光禪寺崇德寺飛霞觀金雞嶺

案已上三寺一觀俱見寺觀不得又列古蹟應刪金雞嶺亦宜改入山水門今更正

職官誤

南北朝張進之舊志職官安固人永寧令領校尉又見義行傳

案南史本傳進之永嘉安固人歷五官主簿永寧安固二縣領校尉考其文義領校尉三字乃歷叙官階而并及之非縣令兼官也宜削去又安固卽瑞安旣曰永嘉安固人則非永嘉人矣入義行傳中亦誤

唐永寧縣令程振康熙府志不載乾隆志據唐書程務挺

傳補錄府志同

案本傳務挺父曰名振凡六見今刪去名字誤一隋河南郡有永寧縣非永嘉之永寧誤二名振初仕竇建德在隋大業末俄棄賊自歸高祖詔授永寧令使率兵經畧河北永寧在河南故也時江淮以南羣盜竊據如李子通杜伏威沈法興輩而苗海潮方據永嘉豈能越江淮數千里而令東越乎武德初次第削平浙東西郡縣初入版圖武德五年以縣置東嘉州析置永寧安固橫陽樂成四縣見唐書地理志此置永寧之始苗海潮亦於六年三月始降見高祖紀時程名振已轉洛州刺史

封東平郡公矣此誤收而并改其名蓋不及詳考地理年代及上下文而滋譌者也又次永嘉令於永嘉令之下亦誤

宋縣令詹夫作詹夫胡衍作胡衍周秘作周秘趙汝掄下作泰定趙大猷作范大猷府志同

案已上舊志均誤辨見職官門各條下

元縣尉王楚山舊志云遇賊戰死之見名宦帖木傳

案今舊志名宦中並無帖木傳及王楚山事見府志武宦帖木傳中則府志二字自不可省

人物誤

漢蔡敬則舊志武功

案蔡敬則瑞安人光和間舉孝廉見瑞安縣志選舉及人物循吏傳壇廟墳墓皆有之舊志誤

唐葉一源字九江其先栝之松陽人大父格心徙永嘉因家焉一源幼有志操能詩書習騎射云云見舊志忠臣案瑞安志引葉水心廟記云徙永嘉之安陽東郭蓋安陽屬永嘉郡故各志誤作永嘉人今水心集亦無此文故削之節錄於此

宋王景山舊志儒林引萬厓府志云初名開祖府志同

案宋史藝文志儒志編一卷王開祖撰許及之序云先

生名開祖字景山 國朝四庫全書總目同陳謙儒志

先生學業傳亦云王景山諱開祖惟舊志儒林傳標題

景山而曰初名開祖不知其何所本也

元蔣允汶舊志儒林

案允汶青田人詳下經籍條今改入寓賢

宋徐誼舊志名臣引宋史本傳乾道八年進士後知建康

府移知隆興府卒

案水心集知隆興府徐公墓誌有徐寅者相王審知寅

之孫薄其官遜於平陽自號處士處士廟於沙岡為別

祖是誼世為平陽人康熙府志亦作平陽人舊志誤

宋方睦舊志見文苑又見隱逸明謝廷循見文苑又見方

技張天麟見武功又見仕績所載事實大同小異

案已上三人均一人兩傳誤又案舊志人物如名臣業已立傳又列其名於他傳

中注云傳見名臣此亦與一人兩傳無異非志體也

宋錢敬直舊志文苑引葉適錢敬直墓誌字敬子以祧廟

諱改名易直字季莊

案墓誌稱敬直忠懿王九世孫五世祖尚徙温州樂清

為其邑人又稱祖堯卿紹興中舉孝廉因表其居曰孝

廉里樂清志堯卿居白石是敬直實樂清人舊志誤

國朝翁應春舊志文苑著蚩冷符

永嘉縣志 卷三十六
案蚩洽符應作諭癡符本顏氏家訓舊志妄改

國朝鄭如夔舊志文苑

案如夔樂清人僑寓永嘉見樂清志附傳今改寓賢

宋陳侃舊志孝友又見義行作陳侃

案宋史陳侃附許祚傳侃卽侃字之俗體舊志兩傳事蹟皆不引宋史一引萬厯府志一引明一統志互有詳畧實一人一事也遂作兩人失考

明張鳴鸞舊志仕績

案鳴鸞自有傳而其父張純傳中又附見殊贅

晉張薦舊志隱逸永嘉人有高操隱居樂清丹霞山郡守

王羲之訪焉不獲見而去

案永嘉郡記樂成縣民張薦隱居頤志不應辟命王右軍聞而造之是文君實樂清人舊志誤

後五代蔣湛舊志隱逸傳引浙江通志有高操刺史季廣琛建牙持牒詣其家徵之不就至今名其鄉曰建牙

案蔣湛爲蔣渙之弟據水心集蔣行簡墓誌云蔣氏本陽羨人梁普通初蔣渙爲永嘉守從弟湛以西華奇山也留居不歸武帝賢而官之命後守卽廬授焉故鄉名建牙是渙與湛並蕭梁人無疑而萬厯府志載蔣渙爲温州刺史在後梁開平間與水心集不合又水心集但

曰梁武帝命後守卽廬授湛官不詳後守姓名而乾隆府志則以後守爲季廣琛

萬厯康熙府志不載

萬厯志職官門梁

温州刺史蔣渙後亦有季廣琛考舊唐書肅宗紀上元二年正月温州刺史季廣琛爲宣州刺史則廣琛自是唐人旣非後梁温州刺史又與蔣渙渺不相涉乾隆府志乃沿浙江通志之誤以蔣渙後守爲廣琛尤誤中之誤不足辯也吳任臣十國春秋亦云蔣渙季廣琛相繼爲温州刺史吳書援据多疏舛此條蓋卽襲地志誤文要之蔣渙自是蕭梁永嘉太守季廣琛自是唐温州刺史與後梁並無涉水心集述蔣氏先世當据其家狀謀

舊文必無差誤舊唐書爲劉昫所脩去李唐時代不遠所載亦必可依据今据此二書參互考定以蔣湛收入蕭梁寓賢而刪季廣琛三字後之脩郡志者宜以蔣渙歸之蕭梁以季廣琛歸之李唐庶不爲舊志所誤矣

宋鄭秦臣舊志隱逸

案卽趙清獻集之鄭廣字秦臣所載事實與趙詩注合府志不載其名題曰鄭秦臣亦失攷舊志作秦臣誤

宋徐必友舊志隱逸鐸孫政和間屢薦不起隱柏洋山下案徐鐸熙寧九年狀元平陽人必友見平陽志隱逸柏洋山亦在平陽舊志誤

永嘉縣志 卷三十一
明何白舊志隱逸

案何白樂清人今改入寓賢

明劉康祉舊志隱逸與仕績之劉康祉相混

案劉康祉字以吉見仕績此係康祉之誤康祉字幼安一仕一隱截然兩人社社二字以字形相近而誤

國朝侯思炳舊志隱逸

案府志思炳樂清人亦見樂清志隱逸舊志誤

明郭純舊志方技引東里集初名文通精繪事太宗賜名純擢營繕所丞洪熙初陞閣門使

案黃淮介菴集樂清人永樂中淮嘗薦之得召見賜名

純志以爲邑人誤以成祖爲太宗尤誤

明柳楷湯志方技

案府志選舉楷以童子舉官中書舍人瑞安人湯志誤唐包全舊志寓賢引府志字子周會稽人舉貞元乙丑進士官福州長溪令自會稽入永嘉至安固寓庫村

案庫村爲今泰順地唐時屬安固非永嘉也舊志誤

唐崔道融舊志寓賢引府志荆南人自稱東甌散人著東浮集九卷乾寧乙卯永嘉山齋編成蓋避地於此者

案道融以徵辟爲永嘉令後避地入閩見全唐詩鈔小傳舊志誤今補入職官

五代吳睦舊志寓賢注云傳詳名臣

案名臣無吳睦府志有之所居乃安固庫村非邑境唐

書五代史俱不載其人蓋譜家附會之詞未可信也

宋朱熹舊志寓賢引府志乾道閒館樂成講道東臯山麓

其往來小徑名文公巷

案文公巷在樂清旣言館樂成於永嘉無涉舊志誤

宋徐定舊志仕績寓賢兩見

案徐定泉之晉江人娶永嘉鮑氏因家焉應入寓賢不

宜復入仕績舊志誤

宋阮存舊志選舉鄉薦下云進士有傳

案明進士阮存傳詳仕績宋進士無阮存名今削

經籍誤

蔣允汶尙書通考 大學章旨 中庸詳說 四書條類

蒼巖先生文集 乾隆府志

案蒼巖蔣訓導允汶萬厓府志乾隆志並有傳考東甌

詩集有蔣文質注云字彬夫永嘉人號蒼巖所載字號

與允汶同而名特異王齋自撰壙志云登蒼巖先生蔣

公文質之門則文質卽蒼巖無疑其作允汶或入明以

後所改也然陳高蒼雪軒記云蔣君文質舊居栝之青

田後僑居永嘉其所述與舊府縣志稱蒼巖蹤跡亦合

則蒼巖本貫青田所著書卽不宜收入今刪

參温州經籍志下同

俞德鄰佩韋齋輯聞詩說一卷 佩韋齋文集十六卷

正

通志乾隆府志乾隆志作佩韋齋輯聞四卷

案至順鎮江志元俞德鄰永嘉平陽人宋寶祐中父卓

爲廬江令僑寓京口因家焉有佩韋齋文集十六卷輯

聞四卷宋濂俞希魯墓碑亦云先生之先居溫之平陽

大父某爲廬江令始遷鎮江父德鄰鄉貢進士是德鄰

已爲鎮江人非永嘉人今刪

薛季宣伊洛遺禮

伊洛禮書補亡

萬麻乾隆府志有伊洛遺禮乾隆志有伊

洛禮書補亡雍正通志二書並題陳傳良集

案此二書薛陳二先生行狀並不載考陳亮龍川集有

伊洛禮書補亡序云吾友陳傳良爲余言薛季宣士隆

嘗從袁道潔游道潔蓋及事伊川自言得伊洛禮書欲

至蜀以授士隆道潔死無子不知其書今在何所伊川

嘗言舊修六禮則信有其書矣道潔之所藏近是惜其

書之散亡而不可見也因集其遺書以爲伊洛禮書補

亡又書伊洛遺禮後云伊洛遺禮其可見者惟婚與喪

祭僅存其一二今以附諸補亡之後然則二書皆亮所

撰文獻通考錄之亦不題陳薛二先生撰舊志蓋因序

中述二先生語遂誤據收入今刪

蘇太古古禮書敘畧

王柏魯齋集乾隆志

案蘇太古事蹟無考惟金履祥仁山集有送三蘇君序曰愚翁先生蘇公來官金華其三秀從焉長曰太古仲曰佩韋季曰會心皆所以號也又有九月初永嘉蘇太古同游金華洞夜宿鹿田寺詩是太古乃別號非名也考萬厯府志寶祐癸丑進士有蘇文洪瑞安人佩文齋書畫譜引王魯齋集蘇基先温之瑞安人登寶祐癸丑第初調臨安府浙江稅終金華令科第履貫同而名不同仁山集所稱愚翁先生或卽基先歟則非永嘉人也南宋人稱温人爲永嘉蓋用永嘉郡舊稱今不著於錄

李倫家禮酌中

萬厯府志作酌中隆慶樂清縣志作酌宜

案李倫樂清人舊志誤今刪

朱文簡學庸圖說

乾隆府縣志

案文簡樂清人見樂清志舊志誤

戴厚經解三卷

乾隆志

案經義攷作經解三十卷舊志誤

戴仔非國語辨

乾隆志

案戴守鏞非國語辨篇見慎江文徵經義攷亦著錄然

非單行著述今刪

陳謙謝修撰墓誌

雍正通志乾隆志

永嘉縣志 卷三十一
案直齋書錄解題修撰行狀墓誌一卷昭武謝師稷
務本行狀里人黃通撰墓誌陳謙撰因有與黃氏行狀
合刻單行本故著於錄謝氏既非溫人陳誌亦非著述
今刪

張叔椿建安志二十四卷

萬麻府志
乾隆志

案直齋書錄解題建安志二十四卷刪定官郡人林光
撰慶元四年郡守永嘉張叔椿俾僚屬成之是此志本
林光所撰張春卿守建安令僚屬補成之非出春卿手

纂今刪

張聲道岳陽乙志三卷

乾隆府
縣志

案聲道清熙進士瑞安人舊志誤

李至剛耽羅志畧三卷

乾隆府
縣志

案至剛樂清人孝光從子舊志誤

項喬董子故里志六卷

雍正通志
乾隆府縣志

案天一閣書目董子故里志李廷寶撰又甌東私錄董
子遺事志序畧云某叻先生故里守嘗欲繼絕世脩故
墓而苦無端緒景守李廷寶適志遺蹟遺文及先賢所
嘗贊記云六卷而以序屬余是董子故里志實景州守

李廷寶所作甌東特序其書耳非即所著也今刪

林武朱子語錄

萬麻府志
雍正通志
乾隆府縣志

包定池州語錄

雍正通
志
乾隆

府縣志

案朱子語錄宋代傳本至夥黎靖德編語類卷首列記錄姓氏凡九十七家采摭詳博並無林武包定所記且池州語錄為嘉定乙亥李道傳所集黎書載道傳自叙明白可據塙非包定所編此二書皆不足信今刪

鄭景望蒙齋筆談雍正通志乾隆府縣志

案四庫全書總目蒙齋筆談二卷舊本題宋鄭景望撰商濬刻之稗海中厲鶚宋詩紀事亦曰景望湘山人生元豐元祐間有蒙齋筆談今考其書乃全錄葉夢得巖下放言之文但刪其十之三四而顛倒其次序濬蓋誤

刻偽本今刪

周達觀誠齋禱記二卷雍正通志乾隆府縣志

案四庫總目誠齋禱記二卷舊本題元林坤撰前有永嘉周達觀序稱坤會稽人所著書凡十二種此乃其一誠齋坤自號也他書誤為達觀所著舊志承其謬今刪

釋法樞鐵關和尙語錄二卷乾隆志

案妙覺真空大師法樞平陽人舊志誤

釋啟元太初語錄萬厯志乾隆府縣志

案乾隆府志仙釋傳啟元作啟原日本人吳元年航海入中國後入安固抵石山駐錫是啟元乃倭產今刪

倪濤玉谿集二十二卷

萬厓府志雍正通志乾隆府縣志

案直齋書錄解題玉谿集二十二卷左司員外郎永嘉

倪濤巨濟撰其父始徙居廣德云云又案東都事略文

藝傳宋史文苑傳並作廣德軍人蓋其父始徙廣德至

巨濟已為土著直齋題永嘉蓋據舊貫言之耳今刪

徐泳橫梁醉稟

乾隆府縣志

案泳見平陽志武科橫梁醉稟亦見書目舊志武科無

泳名而經籍收之誤矣

萬規東平先生集

乾隆府縣志

案萬規見樂清志人物東平先生集見書目舊志誤

孔子升潔菴集

乾隆府縣志

案子升名暘平陽人元進士潔菴集凡十二卷蘇伯衡

為之序見平陽志舊志誤

盧摯疎齋集

乾隆志

案元詩選三集盧摯字處道號疎齋涿郡人著有疎齋

集據此是盧疎齋乃涿州人乾隆府縣志文苑傳別載

盧摯字處道永嘉人善詩文與高明齊名其字與疎齋

同疑卽一人舊志相沿誤載耳今刪

東甌王氏平冤錄一卷

見焦氏經籍志疑卽王淵無冤錄

案無冤錄乃王與所撰非淵也

陳雷竄菴集

乾隆府縣志

案列朝詩集甲集前編陳雷字公聲嘉興人秀民之子

有竄菴集蓋秀民僑居嘉興其子已著籍於彼舊志誤

高友璣南屏遺藁

乾隆府縣志

案友璣樂清人舊志誤

姚汝循錦石山齋集

雍正通志乾隆府縣志

案千頃堂書目汝循字敘卿上元人

明詩綜亦作上元人

通志引

黃目作永嘉人蓋偶據誤本府縣志悉沿其誤今刪

李光春西臺奏議

乾隆府縣志

案光春樂清人西臺奏議見樂清志書目舊志誤

陳少垣雞肋集

乾隆志

案少垣名昌時以字行則翁長子瑞安人舊志誤

宋黃仁榮永嘉集

李知己永嘉集

俱見宋史藝文志

元章嘉

永嘉縣志

明邑令汪循永嘉志

又東甌倡和集

郡

守鄧淮鹿城書院集

樂清蔡璞東甌詩集

國朝石門

勞大與甌江逸志

案已上均非邑人著作宜改入文外編

藝文誤

謝靈運橫陽還嶠上詩注一作遊嶺門山詩又行田登海

口盤嶼山詩又白石逕為民行田詩又斤竹澗越嶺溪行

詩

案橫陽卽平陽嶺門山在城南盤嶼白石斤竹澗俱樂

清地舊志誤

謝靈運歸塗賦

案賦中所云登青田之枉渚搜縉雲之遺迹實非指今

永嘉也舊志誤

孟浩然晚春臥病寄張八子容詩

案子容尉樂清詩中無一語及永嘉舊志誤

李頎送馬錄事赴永嘉詩

案詩言主印清淮邊又言楚雲飛面前非永嘉明甚全

唐詩錄永嘉作永陽舊志易陽爲嘉尤誤

趙凝送張又新之任詩

案全唐詩錄係趙嘏作舊志作凝誤

張又新常雲峰詩

案樂清有常雲山亦名靈府山詩云仙府靈臺莫漫登

是也舊志誤

李維楨送人之永嘉東李五峰詩

案五峰樂清李孝光也詩曰雁蕩落日照松扉又曰五

老峰前攬夕暉均指樂清稱永嘉統名耳舊志誤

侯一元贈王相山督學之楚詩又理說載名理篇四章

何白哀江頭詩 侯思芹贈司李嵇叔子遷守杭州詩

案已上三人俱樂清人舊志誤

陳水雲冷泉夜坐詩

案此係趙靈秀詩作陳水雲誤

災祥誤

晉太寧三年有白鹿銜花止於安固之白巖山 舊志引府志

案安固即今瑞安與永嘉無涉况太寧元年載有此事

疑本一事重出萬厯府志無是也今刪之

宋建炎三十二年大風壞屋覆舟 舊志引宋史五行志 紹興三十二

年秋七月颶風大水 舊志引府志

案建炎盡四年當作紹興下引府志云云即一事而重

出者也湯志已正之矣

元世祖至元二年蝗 舊志湯志引元史五行志 至元五年芝草生於郡

城之松臺山狀如連雲文彩煜然 舊志湯志乾隆府志

案世祖至元二年係宋度宗咸淳元年至元五年乃咸

淳四年其時永嘉屬宋不屬元考元史五行志順帝後

至元三年六月温州蝗是舊志誤以後至元三年為前

至元二年也今與府志五年一條均移泰定之後 又

案至元五年一條萬厯府志不載康熙府志作至元甲

子歲尤謬甲子乃世祖至元二年宋景定五年也 又

泰定元年以下六條自至元元年至二十七年均宜作至正今誤作至元其至元十八年應作至正八年戊子

雜記誤

來斯灘在北閣仙溪昔有神人驅石之海一則

案來斯灘在樂清雁蕩見廣雁蕩山誌

高則誠撰琵琶記雙燭花交一則

案則誠名明瑞安人元詩選云則誠寓鄞之櫟社沈氏樓作琵琶記成按拍歌舞蠟炬二枝光忽交合因名瑞光樓則人爲瑞人地爲鄞地與永嘉無涉

晉書本傳不言右軍嘗守永嘉一則 宋陵拾骸林處士

事與唐處士同一則 又論侯一元二則

案右軍守永嘉當入府志林平陽人侯樂清人均與本志無涉此皆隨手刺取府志之誤

存疑

古蹟疑

新城方輿紀要晉太寧初置郡議築城於江北岸去今城六里今温州謂其地曰新城 舊志卽永寧故城今其地爲田野猶稱新城云

案唐書地理志武德五年以縣置東嘉州析置永寧安固橫陽樂成四縣疑江北之城武德時所置故稱新城

永嘉縣志 卷三十一
至貞觀元年仍省入永嘉也前人皆言孤嶼在城南以此

讀書堂舊志引明一統志在舊郡治謝靈運讀書於此謝靈

運齋中讀書齋舊志引晏殊類要城內西偏有謝康樂

讀書齋謝靈運讀書齋詩

案讀書堂疑卽讀書齋今併爲一

李集宅在茶山唐宗室隱居於此

案舊志仕績傳李唐卿唐河閒王孝恭裔自虔徙永嘉

茶山蒼墩李氏宗譜注云李唐卿其先出於唐河閒王

孝恭八世孫集考唐書宗室表河閒元王孝恭裔有先

遠者初名可集別有可信可誠可立則可爲輩行字亦

得省稱集自王至集正八世疑卽其人

芙蓉亭浙江通志湯志彙引明一統志在府治 君子堂

在舊郡治舊名芙蓉亭

案上芙蓉亭疑卽下君子堂

職官疑

元縣尹趙搭蒞

案金華徵獻錄作大納宋濂浦陽人物志及舊志名宦

傳永嘉縣學碑竝作塔納上从土下無艸考搭蒞塔納

大納音皆相近疑元人尙翻譯惟取音近不必有一定

之字耶

永嘉縣志 卷三十一
明訓導王淵

案淵王氏譜作瀾又儒林傳言洪武三年舉進士檢府縣志選舉門及科名碑俱無之蓋舉進士者應試之名非中式之謂且洪武三年鄉試四年乃會試焉得有三
年之進士乎又訓導王元傳名澤傳疑係溥字之誤

選舉疑

宋宏詞科李仲意知真陽縣遷臨安府尙孝宗長公主授駙馬都尉公主諱柔正生而眉髮皓然有白祥之號賜湯沐萬戶告身四道後以入覲卒於臨安

舊志乾隆府志同萬厯府志但注駙

馬二字

案宋史公主列傳皆詳載公主封號及駙馬姓名其再嫁者亦著之惟高孝光寧四朝女皆早亡孝宗二女長公主已受封而亡其次未及封而亡長公主既未下嫁又安得有駙馬哉且徧考宋史亦無柔正公主之號今檢蒼坡李氏譜但云真陽縣不載宏詞科並無遷臨安府事志與譜亦屬兩歧今姑仍舊志入宏詞科而附辨之

又按朱氏蜃濱襍記謂仲意嘗通判溫州署中有公主梳妝臺舊址尤屬無稽

人物疑

鄭洪鄭君舉詩一卷

案洪字君舉號素軒有詩一卷爲秀水曹侍郎溶家藏

永嘉縣志 卷三十八
本題其簡端云是永嘉人蓋本賴良大雅集也而朱竹垞謂三衢人按顧奎光元詩選姓氏爵里考亦作永嘉人今從之

朱聳舊志隱逸作朱聳經籍作朱贅山川又作朱聳

案朱氏譜牒作朱聳然府志俱作聳今從府志

周頤真洞浮老人集

萬厯府志雍正通志乾隆府縣志

案通志周頤真永嘉人府縣志則云閩福清人至元丙子徙居永嘉當非無據今姑存其人於方外而刪其集元陳秀民舊志文苑

案府志作温州人縣分未詳今姑仍舊志

附錄

蒼山周氏女及笄未字汲水溪邊見一石卵潤澤可愛懷之卽墮落乃含口中不覺吞下遂有娠後產一白龍女驚死鄉人取其骸骨塑以泥藏置巖洞閉旱則迎之祈雨嘉靖十三年大旱縣尹周琬禱弗應有繫獄者稱係龍母族裔獻議迎龍母渡江及抵山川壇俱霏微雨護送有從行者負旗先驅戒勿展眾望雨久強展之風雨頓作龍負雲起如白氣舞於空中嘖嘖有聲開元寺溫衛治多拔仆惟山川壇龍母殿不動燭亦不滅雨傾蓋下不移時河溢入城嗣後亢旱禱輒應

舊志下同

梅大歇能神遊一友亦善其術會丁祭乃共處一室相戒各出神規聖人受享狀至則境內百神畢集武士呵衛警蹕其友止門外不得前大歇術稍高盡其法力擠至靈星門亦止矣遙睇座中一巨星炯然諸神陪位擬於饗帝已而兩人各言之其語悉合

元延祐四年六月十七日晚有無舵小船飄至海島中界山地名燕宮內有一十四人五人穿青黃色服九人並白衣內一人攜帶小木刻字長短不等計三十五根其上刻畫不成字樣提挈葫蘆八枚內有青黃白色成串硝珠其人語言不辨本路圖畫人形船隻差官將各人起解江浙

行省十月中書省以聞奉旨訪通曉語言之人詢係海外婆羅公管下密牙古入氏凡六十餘人乘大小二船欲往撒里郎地方博易貨物途遇大風大船已壞惟十四人乘駕小船飄流至此有旨命發往泉南候有人往彼帶回本國

明洪武八年八月有海舟至温州港衛府差官到舟譯者黃宗起稱暹羅斛國王列參寶昆耶里哩哆囉祿於六月初一日恭遣正使冒崑坤信副使詔璫哆囉齋奉金文進貢白象方物前赴大明國朝見撒差巴寫寶招歐靄船裝載過海遇風飄至遂移舟泊温州城下衛府差官送陸路

至行在其文色雄象命象奴於本府開元寺喂養內方物
苾布西洋紅布兜羅綿被象牙胡椒黃蠟降真香蘇木至
九年始回本國

崇禎五年有番舶泊海口以桅舵損壞教人入地內覓料
匠爲守關兵船所覺強拽入港下其船艙底以金銀壓礎
艙內金寶無算闔郡官皆以勘驗爲名次第登舟理刑某
見黃金爲條長二三寸許亂揣懷袖靴桶皆滿蹣跚坐輿
歸猶怏怏不足乘夜各官將貨物盡起入城僕從因而驟
富發家者不知其幾一役得阿魏一器嗅之臭投之江一
役得算盤一具次早視之珠爲之也以壞船報上司查詰

數四彌縫而止船擱外沙浦未幾劉香入寇圍城羣賊奔
壞船破其水櫃下夾板中扛白金數萬去守城軍民從塚
口遠瞭莫可如何或曰船內所裝卽劉香物故突犯剽劫
取償民間爲地方劇禍云

國朝乾隆十八年六月十二日溫鎮左營守備於南龍洋
面盤獲番船一隻男女五十二人并槍劍鐵炮火藥等物
押護進口停泊內港其人髮鬢日圓睛綠衣禪相連上衣
背鈕無數帽用紅紗紬摺捲露頂一頭目手執一物似如
意頭用金鑲有女年可十七八髮下垂足跣目亦微圓美
倩似中華少好女子言語俱不通閱月厦門送到外夷

通事賴祿譯知是干系臆國人名龍番教魯羅邦分封屬國呂宋王下作判事官號亞里閒麻油駐管泰賢世賴地方其手所執是彼國王給與三品職銜憑據有文憑三紙隨身二是干系臘國王印文一是呂宋國王印文各畫其國王面刻就印刷五年任滿攜帶眷屬回見呂宋國王過海遇大風約經百日飄至此時當夏秋風信不便鎮道諭令將船內人口及器物搬移上岸暫住校士館飛報大憲摺奏動帑給其食用并修葺船隻凡四月風順遣水師弁兵送至廈門令往販呂宋商船便帶歸國

葉尙高祭文廟文嗚呼天兮何忍嗚呼人兮何辜嗚呼斯

文兮幾於喪嗚呼吾道兮從是污嗚呼變生叵測兮振古未有嗚呼禍起非常兮諸夏所無嗚呼棖桷猶存兮悵離離之彼黍嗚呼髮膚致毀兮悲蓼蓼之匪莪嗚呼裸將於廟兮何莫非先朝之彥嗚呼駿奔於堂兮殊異於聖人之徒嗚呼裸體文身兮斷不肯效尤於虞仲嗚呼被髮左衽兮然後知受賜於夷吾嗚呼悠悠我思兮自分爲識君臣之螻蟻嗚呼渺渺予懷兮豈同不知春秋之螻蛄嗚呼旣不克在泮獻囚兮如皋陶之淑問嗚呼亦僅等敗軍之將兮與亡國之大夫嗚呼雖不得與于祭兮猶惓惓於泗水之濱尼山之土嗚呼余小子固有志兮爰采采乎西山之

蘇北海之蒲嗚呼澗毛可以昭明信兮何羨乎腥臄之肥
膺嗚呼白水可以薦馨香兮奚取夫清酒之百壺嗚呼吾
師乎嗚呼吾師乎雖泰山之已頽兮曾林放之不如乎雜錄
永嘉有一人患瘡藍縷寒餒市中求乞有薛主簿憫之來
與飲食去亦不謝薛後暴卒陰府追至爲前生冤家執論
遣令勘對薛方回身報大舅至王起身迎謁薛視之乃瘡
者也遂高聲叫相救瘡者驚曰主簿何爲來此乃謂王曰
老舅承斯人顧盼可爲拔之乎王謂吏檢簿書云有三十
年在王乃謂薛曰能作善業可得還薛曰如得生還願造
尊勝幢子儻解冤讐王命押回引從舊路歸至所居門首

似夢覺家人號泣曰一宿矣後遂每日一食輒建幢子專

持念其瘡者卽不復至乃圖像供養焉

唐傅亮
靈應錄

山人黃子復擅巧思製木偶運動以機無異生人嘗刻美
人手捧茶托自能移步供客客舉甌啜茗卽立以待甌返
於托卽轉身向內而入又刻爲小者置諸席上以次傳觴
其行止一視觴之舉否周旋向背不須人力王陽德曾捐
十金購谷簾秋古琴僅存壞板數片黃爲重造卒成完器
聲音清越冠絕一時

岐海
瑣譚

郡西敵樓在放生河畔康熙間郡大夫建以瞰敵故名或
云宋時方臘之亂教授劉士英禦敵所建然亦無攷嘉慶

甲戌城守金國標倡捐重建上祀關帝下洞其門以便往來休憩道光初元燬後再建陳遇春易其名曰笛樓有笛樓記見梧竹山房文彙今樓圯改爲茶亭

相傳有張氏子與李女比鄰幼結婚及長張母寡且貧李謀離婚女不從會元宵觀燈女見張即捨伴從之訴衷曲知婚無合期行至橋上相抱投水杳無知者次年水中蓮開並頭人皆駭異募人掘根得二屍蓮莖各出一口即張子李女也邑令以其不失貞義合棺題石名鴛鴦橋曰雙蓮當時有詠其事者曰初盟不負鐵心堅割斷塵緣作水仙烏鵲巧催橋上度青娥長展鏡中妍生前果墮相思樹

死後花芳並蒂蓮何處宰官身可見幻髮嬌小愛河邊見

種書堂校刻集異編案宋楊蟠有雙蓮橋詩似即指此蓋唐時事也

陳相心以拆字名於公卿閒推原禍福考索成敗無不驗

見楊維禎拆字說舊府縣志方技

道光丁亥西山護國寺門外佛光如火人見而異之掘地得方石一下埋石琰二俱鑄佛像旁注一萬人同造後五百年有福慧者重興十五字陳遇春誌異詩注云此寺宋紹興二年建以其時則可矣福慧者不知何人或寓言亦未可知詩曰無端光焰起蒼厓五百年前事已排勒石分明苔不蝕未知當日爲誰埋盛衰遞嬗數禪關香火因緣

詎等閒誰是如來今再世黃金布地笑開顏一時名流題詠甚多

陳遇春贊國寺誌

冥財庫為中元焚楮之所向在開元寺右即今倉聖祠基道光中歲貢黃鶚揚以字灰狼籍捐建磚爐於寺後每屆中元無論大小戶以紙糊箱篋滿貯冥鏹投入庫中焚之追薦宗親寓追遠報本之意相傳此舉自明季始所從來遠矣

補遺

山川

温城七山成斗形王十朋駕幸温州次僧宗覺韻詩注七山如北斗楊蟠浩然詩集

案志稱環城之山舊名九斗今據王楊二君詩止稱七

山然則九斗之名殆起北宋後歟歐乘補

雅山宋文憲公濂送覺初禪師還江心寺序師出世建業聖泉遷永嘉雅山鳳山何无咎汲古堂集陳

良楚先世由玉環遷樂山之迎社學山曾丹橋詩九山叢裏

恩橋中歲卜居郡郭鳳山社學山注在郡北鯉

魚毬山界黃土巽吉之間有小阜名毬山

案已上諸山皆郡縣志所未載歐乘補

牛眠山在四十五都昆陽山如牛形首尾相肖又有鹿角山

三龍井在昆陽相傳有三龍浴此劃成三井深數百丈雖大旱井水不竭

祠廟

列女瞿素祠在九都瞿嶼山麓

華光廟一在松臺山麓一在嘉福寺巷嘉慶元年毀於颶
風光緒五年里人重建崇奉華光大帝卽閑窗括
異志所稱華光如來也

選舉薦辟

元茂異黃一龍

字國寶鎮江府教授舊志佚據至順鎮
江志陳友龍鎮江府淮海書院記畧補

人物義行

黃中字通理弟宏芳原名宏智字明遠居泰清鄉藤橋兄
弟六人中芳皆讀書尙義時邑令每以豐熟之年採買常
平倉穀蠹役勒派小民賠累不堪泰清臨江二鄉曾於康
熙中控禁勒碑厥後舊禁漸弛吏役追呼乾隆丙申中乃
搜搨舊碑與金振玉周維新同控撫藩九月暘與楊五兆

等拒捕毆官中懼歸里丁酉夏藩司提審中與叔父卜南
名欽鵬號萬里金振玉及黃岡周雲飛等赴省寓豐樂橋
吉祥寺旣而中疾作乃喚芳至以此事屬之爲易今名勉
其留芳也六月廿七日中歿殯於西湖芳哭之以詩曰馳
驅越嶠渡錢唐凜冽秋風砭骨涼豐樂橋邊誰是樂吉祥
寺裏未爲祥風敲藕葉愁千片露滴松枝淚萬行多少候
蟲鳴唧唧令人幾斷九迴腸八月輿櫬歸戊戌歲藩司委
杭府台府及溫府會鞠六月廿三日集審閏六月望日復
審懸案未結鄰村張某檢得康熙間立碑全案有前督覺
羅滿奏奉 聖諭及前縣林發下碑記硃印如新芳乃

於臨審時遞呈而卜南以憂懼成疾未能赴審程守曰楊
總督諭常平買補如辦不善先究官後究民今爾叔不到
案何能結壬寅歲卜南疾歿席令閱供通詳完結六月芳
與金振玉黃岡周雲飛四人先後出獄舊禁亦復闔邑小
民如出水火而衽席之矣兩鄉戚友欲資助芳不受乃橐
筆授徒以自給嘉慶丙辰芳館戈田金氏友人詢其顛末
而記之如右

採訪冊
下同

呂從龍字協南歲貢生性倜儻好義邑故設莊長督催錢
糧役富民爲之雖生監不免充是役者爲吏胥魚肉家率
破從龍憫之借貢生邵炳生員張樹德等凡十八人展轉

愬大吏自乾隆五十四年至六十年歷七寒暑有司利陋
規皆左袒豪胥不得直而嫉從龍樹德尤甚陰中以他端
褫其衣頂會秦公瀛任溫處道深燭其弊旋攝臬司與方
伯謝公啟昆力持之爲請諸撫院事得白勒碑申禁卒余
莊長里人德之尸祝於先農祠奉秦謝二公粟主併及從
龍同時有吳江者字成桂號仁溪輕財貴義亦以謀革莊
長事左右其閒者也壬子歲貢生巨川候選州同

吳天衢西溪甌渠人孝友敦行慷慨樂施道光十四五年
連歲災歉天衢爲賑饑計築巨室以工代賑積至一萬三
千餘工里之貧者咸就食焉一日大雨巖牆傾圮工人壓

焉急命出之則壞墻上合下開空其中得無恙人謂其散財救贍故得此報年六十四而終子孫世守義方姪通瀾性孝友崇儉樸緩急濟人貧者不責償子三人皆游庠學憲丁給慶徵詒穀額表其間族有吳時輻者敦厚好施每歲暮分錢米饋親隣之貧者又吳浩武庠生以孝友聞里有溪水暴漲深不可測人多病涉浩獨建石橋行者德之其他濟饑療病尤衆人咸謂甌渠吳氏有世德云

人物文苑

明朱道魁字墨臞良暹孫相溪人郡庠生貢入成均壯歲棄舉業韜晦高尙終其身爲溫處二郡義學山長王瓚朱

諫王澈王激皆其弟子著有鍾山詩集墨臞養拙集二十卷其卒也鄉人賦鍾山鶴怨以哀之王激爲之序

朱氏譜

人物忠義

丁天義民金和春業農精權算好檢拾字紙化灰並收埋暴露骸骨同治壬戌四月十二日粵匪入境被擄欲用爲鄉導和春大罵謂汝等殺人放火我肯從汝耶賊怒殺之

孝女

陸茂山女

割股療母病復割股療伯母病

烈婦

王南煇妻林氏

雍正四年十月南煇溺海死柩葬於永昌堡外氏每朝奔墓而哭母欲奪其志誓與

母絕一日焚香浴體服金
不死卒自縊死年二十五

林儒士某妻羅陽夏氏

結褵一載夫亡以死殉焉進士林
芷生芳序其事且作贊曰懿彼淑

媛嬪予宗子黽勉一心辛勤十指及爾同歸靡它自矢
情重三生誓堅一死死者已矣傷如之何匪石莫轉無
瀾豈波招魂水澳畢命山
阿香魂常馥貞珉不磨

古蹟金石

徐德寶妻潘氏墳塋告后土文石碣

維寶慶二年歲丙戌六月甲申朔庚寅日陽上夫徐德寶
男徐亞雙次男阿金女亞前次女住妹云等謹立口告于
五方五帝山川百靈后土陰官丘丞墓伯阡陌諸神切念
德寶蓋為先妻潘氏九娘子於今年二月初五日歿故龜

箠協從相地惟吉宜於温州永嘉縣賢宰鄉羅浮山村黃
家山後之原或東口口口地口為宅兆安厝謹用九萬九
千九百九十九歲口口也口買地壹段口止青龍右止白
虎前止朱雀後止玄武內方勾陳分掌四口口口口口
口口口路口齊整阡陌千秋萬歲口口口口若輒干犯茲
禁將軍亭長收付河伯今口口口酒飯百味香口共為信
誓財地交相分付工匠動土營造墳墓安厝已後永保休
吉見人歲月主保人今日直符故氣邪精不得口口口有
居者永避万里若違此約地府主吏自當其禍主人內外
存亡悉皆安吉急急如五帝主者律令寶慶二年辛丑月

十五日丙申

右石碣得於三十二都千石莊高廣不及二尺今藏瑞安資政第孫氏寶慶爲宋理宗紀元之一

温州府主戴爺問明判案碑記

右碑在十二都茶山實際寺正殿右壁嘉靖四十二年僧廣滔正訪立石據碑文因寺僧欲賣項姓祖捨田畝涉訟控經本道批府審明又云正統十二年立有碑記原係鄉宦黃文簡公撰文備述古蹟今此碑未見其稱本道爲分巡老爹府主爲戴爺可見當時稱謂之質直其文殘缺詞亦俚俗今不錄

望歸亭碑記在四十一都廊下將軍菴道左侯一元撰嘉

靖四十三年爲孝子朱尙綜立

碑文未拓

旌異松鶴處士康公墓誌在十八都郭溪水閘頭

案松鶴處士疑卽康從理

碑文未拓

坊表

貞烈坊在十九都宋與河南爲王宗培聘室南氏立

節孝坊一在五都上河濱爲儒童邵瑞璋妻張氏立一在十都阮郎洋爲孫秀環妻王氏立

新志自開局以來首尾不及三年卷帙浩繁增舊志三倍有半所費止三千七百餘緡視鄞鎮二縣志用

至二萬三萬者相去懸絕惟校讎之役殊非易易適
兒子文儁自邗上假旋竭三月之力專任其事改正
訛謬不勝塗乙多至八千餘字其脫畧複衍之處刊
落重鐫者十餘幅尙未能毫髮無憾甚矣校勘之難
也所冀閱者指摘瑕疵藉資補救則幸甚矣再是書
告成於光緒七年後來事蹟不便彙入以示限斷後
之人慎勿妄爲補刊致亂體例如其事應入志乘恐
其久而湮也宜刊永志續補別著年月以備遺忘庶
無攙越之弊咸弼又識

